

COMUNICÂT STAMPE

ZORNADE EUROPEANE DES LENGHIS: ARLEF E PREMIE STRAULINO

Artist furlan plui preseât dal public tal concors inmaneât par Friuli Doc

Udin, ai 26 di Setembar 2013 – Tal dì indulà che si celebre la Zornade europeane des lenghis la ARLeF, Agenzie regionâl pe lenghe furlane, e à premiât il vincidôr dal concors inmaneât in ocasion di Friuli Doc par sielzi l’artist preferît de “Gnove musiche furlane”: il plui amât dal public al è risultât il cjantautôr cjargnel Lino Straulino.

Straulino al à ricevût il premi dal president de ARLeF, Lorenzo Zanon: un mosaic che al rapresente l’agnul dal cjistiel di Udin, realizât dal laboratori di artesanât di Laura Carraro e di Mohamed Chabarik, un sirian che al fevele cun paronance la lenghe furlane e che di agns al studie par promovi l’art e la culture dal Friûl.

“La Zornade europeane des lenghis – al à comentât Zanon – e je un apontament che al cole ogni an par ricuardâ a ducj la impuartance dal plurilinguism in Europe, par fâ cressi la diversitât culturâl e linguistiche e stiçâ l’aprendiment des lenghis, dentri e fûr il contest scolastic: la premiazion dal musicist furlan preferît e je propit tal spirt che il Consei european al à sugjerît par celebrâ la Zornade, definide tant che une ‘fieste des sonoritàs multilinguistichis”.

Il musicist folk Straulino al rapresente benon chest spirt tes sôs voris: tes composizions al cjape ispirazion de musiche tradizionâl de Cjargne, miscliçante cun svariâts gjenars di musiche, dal folk inglês al west coast american. A scomençâ dai agns Novante Straulino al è stât un dai plui interessants esponents de “gnove musiche furlane”, la curint musicâl caraterizade dal ûs dal furlan tant che veicul di espression intun contest gnûf, indulà che la lenghe e ven sperimentade in contescj musicâi forescj.

Propit a Friuli Doc, pe iniziative de ARLeF, Straulino al à presentât il so gnûf album "Gorai" (il prin a jessi realizât in vinîl), intun concerti di grant sucès dutun cul cjantautôr Stefano Fedele.